

VENDIM
Nr. 399, datë 19.6.2019

PËR RREGULLAT PËR SHKËMBIMIN E GRUPEVE DHE TË SHËRBIMEVE TË TË DHËNAVE GJEOPAPËSINORE NDËRMJET AUTORITETEVE PUBLIKE

Në mbështetje të nenit 100 të Kushtetutës dhe të pikës 3, të nenit 19, të ligjit nr. 72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”, me propozimin e Zëvendëskryeministrit, Këshilli i Ministrave

VENDOSI:

I. RREGULLA TË PËRGJITHSHME

1. Bazuar në nenin 19, të ligjit nr. 72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”, autoritetet publike shkëmbejnë ndërmjet tyre grupet dhe shërbimet e të dhënave gjeohapësinore, që kanë në administrim, vetëm për qëllime të realizimit të funksioneve të tyre publike.

2. Për të dhënat gjeohapësinore që janë bërë pjesë e GIS-it Kombëtar dhe janë publikuar në Gjeoportalin Kombëtar shkëmbimi do të bëhet nëpërmjet përdorimit të shërbimeve të rrjetit të këtij gjeoportali, sipas përcaktimeve të kreut II, të këtij vendimi.

3. Për të dhënat gjeohapësinore që nuk janë publikuar në Gjeoportalin Kombëtar, deri në momentin e publikimit, shkëmbimi do të bëhet sipas përcaktimeve të kreut III, të këtij vendimi.

4. Në asnjë rast të dhënat apo grupet e të dhënave gjeohapësinore, të marra me qëllim realizimin e funksioneve publike, nuk mund të përdoren për qëllime të tjera apo t’u vihen në dispozicion të tretëve, me përjashtim të ASIG-ut.

5. Refuzimi për të vënë në dispozicion informacion gjeohapësinor, në çdo rast, duhet të jetë i argumentuar dhe bëhet objekt i shqyrtimit në Bordin për Informacionin Gjeohapësinor (BIG).

6. Kufizimet për shkëmbimin e informacionit gjeohapësinor, për çdo rast, bëhen me vendim të ASIG-ut, dhe vetëm për shkaqet e parashikuara në pikën 2, të nenit 19, të ligjit nr. 72/2012.

II. MARRJA E INFORMACIONIT NGA GJEOPORTALI KOMBËTAR NËPËRMJET SHËRBIMEVE TË RRJETIT (SHKARKIMI I TË DHËNAVE)

1. Autoriteti Shtetëror për Informacionin Gjeohapësinor (ASIG), në bazë të nenit 23, të ligjit nr. 72/2012, “Për organizimin dhe funksionimin e infrastrukturës kombëtare të informacionit gjeohapësinor në Republikën e Shqipërisë”, ofron për të gjithë përdoruesit shërbimet e rrjetit për aksesin në informacionin gjeohapësinor.

2. Për autoritetet publike që përdorin informacion gjeohapësinor për të realizuar funksionet e tyre publike, ky informacion ofrohet pa pagesë.

3. Aksesin për shërbimin e shkarkimit (shkëmbimin e të dhënave), për autoritetet publike, ofrohet nëpërmjet Gjeoportalit Kombëtar, pas pajisjes së autoritetit publik me kredencialet e nevojshme (*username, password*).

4. Pajisja e autoritetit publik me kredencialet e nevojshme nga ana e ASIG-ut bëhet vetëm pas kërkesës zyrtare me shkrim dhe përcaktimit prej tij të personit/ave përgjegjës.

5. Pasi analizohet kërkesa, drejtori i Përgjithshëm i ASIG-ut autorizon administratorin e sistemit për pajisjen e personave të autorizuar të autoritetit publik me kredencialet e nevojshme dhe lejen për të përdorur shërbimin e shkarkimit.

6. Llogaria e hapur në emër të autoritetit publik i dërgohet zyrtarisht institucionit.

7. Marrja e informacionit, për çdo rast, realizohet në mënyrë automatike nga sistemi, pas plotësimit të fushave të nevojshme, të përcaktuara në manualin e hartuar dhe të publikuar nga ASIG-u, në Gjeoportalin Kombëtar.

8. Arsyetimi i kërkesës, bazuar në nevojën për kryerjen e funksioneve publike të institucionit, është kërkesë e detyrueshme, pa plotësimin e së cilës nuk mundësohet marrja e informacionit.

9. Lejimi për shkarkimin e informacionit apo refuzimi i tij i shkojnë autoritetit publik (kërkuesit) me *e-mail* duke i dhënë edhe *link*-un e shërbimit të shkarkimit në rastin e pranimin të kërkesës dhe arsyen e moslejimit të shkarkimit në rastin e refuzimit.

10. Përjashtimisht, kur mundësitë teknike nuk lejojnë shkarkimin e informacionit, ai ofrohet fizikisht, pas kërkesës me shkrim dhe vënies në dispozicion të pajisjeve të lëvizshme (*usb, cd, dvd, hardisk* i jashtëm) për depozitimin e informacionit.

III. MARRJA E INFORMACIONIT NGA AUTORITETI PUBLIK QË E ZOTËRON, NËPËRMJET KËRKESËS ME SHKRIM RAST PAS RASTI

1. Për të dhënat gjeohapësinore që nuk janë publikuar në Gjeoportalin Kombëtar i paraqitet kërkesë e argumentuar, me shkrim, autoritetit publik që i zotëron ato.

2. Në çdo rast kërkesa i dërgohet për dijeni ASIG-ut, si autoritet kombëtar përgjegjës për informacionin gjeohapësinor.

3. Arsyetimi i kërkesës, bazuar në nevojën për kryerjen e funksioneve publike të institucionit, është kërkesë e detyrueshme, pa plotësimin e së cilës nuk mundësohet marrja e informacionit.

4. Autoriteti publik, të cilit i është drejtuar kërkesa, vë në dispozicion të kërkuesit dhe të ASIG-ut të dhënat gjeohapësinore, duke përfshirë edhe metadatën përkatëse, brenda afateve të parashikuara në kuadrin ligjor në fuqi.

5. Në rastin e refuzimit të kërkesës, për të vënë në dispozicion informacion gjeohapësinor, autoriteti publik që e zotëron atë duhet të arsyetojë refuzimin.

6. Ngarkohen Autoriteti Shtetëror për Informacionin Gjeohapësinor (ASIG) dhe autoritetet publike përgjegjëse për mbledhjen, përpunimin dhe përditësimin e të dhënave dhe shërbimeve gjeohapësinore për ndjekjen dhe zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR
Erion Braçe